

四庫全書

經部

欽定四庫全書

儀禮述註卷十五

安溪 李光坡 撰

特牲饋食禮第十五

鄭目錄云諸侯之士祭祖禰非天子之士○疏
曰曲禮曰大夫以索牛士以羊豕彼天子大夫
士此儀禮特牲少牢諸侯大夫士也經直云適
其皇祖某子不云考鄭云祖禰者祭法云適士

二廟官師一廟官師謂中下之士祖禰共廟亦
兼祭祖故祖禰俱言也若祭無間一廟二廟皆
先祭祖後祭禰祭無間尊卑廟數多少皆同日
而祭畢以此及少牢惟筮一日明不別日祭也
特牲饋食之禮○不諏日

註曰祭祀自孰始曰饋食饋食者食道也諏謀也士
賤職褻時至事暇可以祭則筮其日矣不如少牢大
夫先與有司于廟門諏丁巳之日○疏曰云自孰始

者天子諸侯饋孰已前仍有灌鬯朝踐饋獻之事也
及筮日主人冠端玄即位于門外西面

註曰冠端玄玄冠玄端下言玄者玄冠有不玄端者
門謂廟門○疏曰不玄端則朝服一冠冠兩服也

子姓兄弟如主人之服立于主人之南西面北上

註曰所祭者之子孫言子姓者子之所生小宗祭而
兄弟皆來與焉宗子祭則族人皆侍○疏曰姓之言
生也小宗謂繼稱者五世則遷宗子謂繼別為大宗

者若據小宗有服者若據大宗兼有絕服者也

有司羣執事如兄弟服東面北上

註曰士之屬吏也

席于門中闕西闕外

註曰為筮人設之也

筮人取筮于西塾執之東面受命于主人

註曰筮人官名也筮問也取其所用問神明者謂著

也○疏曰凡卜筮實問于鬼神謂卜用龜龜知生數

一二三四五之神筮用著著知成數七八九六之神
宰自主人之左贊命命曰孝孫某筮來日某諏此某事
適其皇祖某子尚饗

註曰宰羣吏之長自由也贊佐也達也贊命由左者
為神求變也士祭曰歲事此言某事又不言妃者容
大祥之後禫月之吉祭皇君也言君祖者尊之也某
子者祖宗也伯子仲子也尚庶幾也

筮者許諾還即席西面坐卦者在左卒筮寫卦筮者執

以示宗人

註曰士之筮者坐著短由便卦者主人畫地識爻爻
備以方寫之○疏曰牢禮立筮三正記云天子著長
九尺諸侯七大夫五士三

主人受視反之

註曰反還

筮者還東面長占卒告于主人占曰吉

註曰長占以其年之長幼旅占之

若不吉則筮遠日如初儀

註曰遠日旬之外日○疏曰曲禮云旬之內曰近某日旬之外曰遠某日吉禮先近日假令孟月先于孟月上旬內筮不吉乃用中旬之內更筮不吉更于下旬內筮不吉即止大夫以上先于前月下旬筮來月之上旬不吉又于上旬筮中旬不吉又于中旬筮下旬又不吉即止今云旬之外日者謂上旬不吉更于上旬外筮中旬非如大夫以上旬前為旬外也○張子

曰祭之筮日若再不吉則止諏日而祭更不筮據儀禮唯有筮遠日之文不云三筮筮日之禮只是二筮先筮近日後筮遠日不從則直諏用下旬遠日蓋亦足以致于鬼神之意矣

宗人告事畢

前期三日之朝筮尸如求日之儀命筮曰考孫某諏此某事適其皇祖某子筮某之某為尸尚饗

註曰三日者容宿賓視濯也某之某者字尸父而名

尸連言其親庶幾其憑依之也大夫士以孫之倫為尸○疏曰云字尸父者曲禮為人子者祭祀不為尸注尸卜筮無父者然則卒不稱名故知是字對父故為名大夫士以孫之倫為尸皆取無爵者無問成人與幼皆得為之曾子問曰祭成喪者必有尸尸必以孫孫幼則使人抱之是也若天子諸侯雖用孫之倫取卿大夫有爵者為之故鳧鷖詩祭尸之等皆言公

尸

乃宿尸

註曰宿讀為肅肅進也進之者使知祭日當來○疏

曰乃緩辭則與筮尸別日矣

主人立于尸外門外子姓兄弟立于主人之後北面東
上

註曰不東面者來不為賓客子姓立于主人之後上
當其後○疏曰尸者父象也主人有子道故北面子
姓兄弟北面陪主人後東頭為上者不得過主人故

為上者當主人之後也

尸如主人服出門左西面

註曰不敢南面當尊

主人辟皆東面北上

註曰順尸

主人再拜尸答拜

註曰主人先拜尊尸

宗人擯辭如初卒曰筮子為某尸占曰吉敢宿

註曰宗人擯者釋主人之辭如初者如宰贊命筮尸之辭卒曰者著其辭所易也

祝許諾致命

註曰受宗人辭許之傳命于尸始宗人祝北面至於傳命皆西面受命東面釋之

尸許諾主人再拜稽首

註曰其許亦宗人受于祝而告主人

尸入主人退

註曰相揖而去尸不拜送尸尊○疏曰知有相揖者約少牢云尸送揖不拜也但彼有送文大夫尊也

宿賓

註曰宿尸與宿賓中無厥明之文則二者同日明矣賓如主人服出門左西面再拜主人東面荅再拜宗人擯曰某薦歲事吾子將泣之敢宿

註曰薦進也泣臨也言吾子將臨之知賓在有司中今特肅之尊賓耳○疏曰此宿屬吏內一人為備三

獻賓之事也知賓在有司中者以上無戒文今宿之云吾子將泣之明知賓在有司內可知按前文有司羣執事如兄弟服東面北上鄭云士之屬吏此云賓在有司內則賓是士之屬吏可知特宿之者將使爲賓也

賓曰某敢不敬從主人再拜賓答拜主人退賓拜送
厥明夕陳鼎于門外北面北上有鼎

註曰厥其也宿賓之明日夕門外北面當門也

於在其南南順實獸于其上東首

註曰順猶從也於之制如今大木舉矣上有四周下無足獸腊也

牲在其西北首東足

註曰其西於西也東足者尚右也牲不用於以其生設洗于阼階東南壺禁在東序豆籩鉶在東房南上几席兩敦在西堂

註曰東房房中之東當夾北西堂西夾之前近南耳

○疏曰大夫士直有東房西室若言房則東房矣今此經特言東房明房內近東邊故云東房也夾室半以南為之以壁外相望則當夾北也夾室在房近南東故云房中之東當夾北也西堂者按爾雅註夾室前堂謂之廂此在西堂在西廂故云西夾之前近南也

主人及子姓兄弟即位于門東如初

註曰初筮位也

賓及衆賓即位于門西東面北上

註曰不蒙如初者以宰在而宗人祝不在○疏曰宰前筮時在門東贊主人辭今在門西同行

宗人祝立于賓西北東面南上

註曰事彌至位彌異宗人祝于祭宜近廟

主人再拜賓答再拜三拜衆賓衆賓答再拜

註曰衆賓再拜者士賤旅之得備禮也○疏曰有司徹主人三拜衆賓皆答一拜卿大夫尊賓賤純臣經

云皆答一拜明人人從上至下皆一一獨答拜以其
純故也所以不再拜者避國公故也此士賓莫問多
少皆得一時再拜者以其士賤衆賓得致禮故也

主人揖入兄弟從賓及衆賓從即位于堂下如外位

註曰為親濯也

宗人升自西階視壺濯及豆籩反降東北面告濯具

註曰濯溉也不言孰劔者省文也東北面告緣賓意
欲聞也言濯具不言潔以有几席○疏曰几席不洗

者告具而已

賓出主人出皆復外位

註曰為視牲也

宗人視牲告充饗正作豕

註曰充猶肥也饗正官名也北面以策動作豕視聲
氣○疏曰聲氣不和即是疾病不堪祭祀

宗人舉獸尾告備舉鼎鼐告潔

註曰備具

請期曰羹飪

註曰肉謂之羹飪熟也謂明日質明時而曰肉熟重
豫勞賓宗人既得期西北面告賓有司

告事畢賓出主人拜送

風興主人服如初立于門外東方南面視側殺

註曰風平也興起也主人服如初則其餘有不玄端
者側殺殺一牲也○疏曰有同服者有着朝服者側
猶特也

主婦視饔饗于西堂下

註曰炊黍稷曰饔宗婦為之饗寗也西堂下者堂之

西下也近西壁南齊姑

亨于門外東方西面北上

註曰亨煮也煮豕魚腊以鑊各一饗詩云誰能烹魚

溉之釜鬻

羹飪實鼎陳于門外如初

註曰初視濯也

尊于戶東玄酒在西

註曰戶東室戶東玄酒在西尚之凡尊酌者在左○

疏曰左為上尊是以鄉飲酒鄉射皆玄酒在西尊酒

在東若燕禮大射唯君西尊不從此義也

實豆籩釶陳于房中如初

註曰如初者取而實之既而反之

執事之俎陳于階間二列北上

註曰執事謂有司及兄弟二列者因其位在東西祝

主人主婦之俎亦存焉不升鼎者異于神○疏曰士
虞記祝俎陳于階間敦東彼虞不致爵故不見主人
主婦俎明此吉祭有致爵主人主婦陳于階間可知
以主婦亦是執事之人也

盛兩敦陳于西堂藉用萑几席陳于西堂如初

註曰盛黍稷者宗婦也萑細葦

尸盥匱水實于槃中篔巾在門內之右

註曰設盥水及巾尸尊不就洗又不揮門內之右象

洗在東統于門東西上凡鄉內以入為左右鄉外以
出為左右○疏曰揮振去水使手乾門右據鄉內以
入為右者

祝筵几于室中東面

註曰為神敷席也至此使祝接神○疏曰前未有使
祝之文

主婦纓笄宵衣立于房中南面

註曰主婦主人之妻雖姑存猶使之主祭祀纓笄首

服宵綺屬也此衣染之以黑其繒本名曰宵詩有素衣朱宵記有玄宵衣凡婦人助祭者同服也內則曰舅沒則姑老冢婦所祭祀賓客每事必請于姑○疏曰引詩者證宵引玉藻者證玄

主人及賓兄弟羣執事即位于門外如初宗人告有司具

註曰具猶辦也

主人拜賓如初揖入即位如初

註曰初視濯也

佐食北面立于中庭

註曰佐食賓佐尸食者立于宗人之西○疏曰士虞禮云主人及兄弟賓即位于西方如反哭位又云宗人西階前北面註云當詔主人此特牲吉禮主人行事阼階宗人亦在阼階南擯主人佐食北面于中庭明在宗人之西可知

主人及祝升祝先入主人從西面于戶內

註曰祝先入接神宜在前也少牢饋食禮曰祝盥于洗升自西階主人盥升自阼階祝先入南面

主婦盥于房中薦兩豆葵菹蝸醢醢在北

註曰主婦盥盥于內洗昏禮婦洗在北堂直室東隅
宗人遣佐食及執事盥出

註曰命之盥出當助主人及賓舉鼎

主人降及賓盥出主人在右及佐食舉牲鼎賓長在右
及執事舉魚腊鼎除鼈

註曰及與也主人在右統于東主人與佐食者尊賓不載少牢饋食禮魚用鮒腊用麋士腊用兔○疏曰東為右人西為左人入時左人在鼎後又盡載牲體于俎又設俎于神坐前賓主當相對為左右以賓尊不載牲體故使佐食對主人使賓為右人而使執事在左而載

宗人執畢先入當阼階南面

註曰畢狀如叉蓋為其似畢星取名焉主人親舉宗

人則執畢道之既錯又以畢臨七載備失脫也雜記
曰杵用桑長三尺畢用桑三尺刊其本與末杵畢同
材明矣今此杵用棘心則畢亦用棘心舊說云畢似
御他神物神物惡桑義則少牢饋食及虞無義何哉
此無義者乃主人不親舉耳少牢大夫祭不親舉虞
喪祭也主人未執事祔練祥執事用桑義自此純吉
用棘心義

鼎西面錯右人抽扃委于鼎北

註曰右人謂主人及二賓既錯皆西面俟也

贊者錯俎加匕

註曰贊者執俎及匕從鼎入者其錯俎東縮加匕東枋既則退而左人北面也

乃祀

註曰右人也尊者于事措使可矣左人載之

佐食升所俎鼎之設于阼階西

註曰肝謂心舌之俎也郊特牲曰肝之為言敬也言

主人之所以敬尸之俎

卒載加匕于鼎

註曰卒已也已載畢亦如焉

主人升入復位俎入設于豆東魚次腊特于俎北

註曰入設俎載者腊特饌要方也凡饌必方者明食
味人之性所以正

主婦設兩敦黍稷于俎南西上及兩鉶芼設于豆南南

陳

註曰宗婦不贊敦釧者以其少可親之芼菜也

祝洗酌奠奠于釧南遂命佐食啟會佐食啟會卻于敦
南出立于戶西南面

註曰酌奠奠其爵解也少牢饋食禮啟會乃奠之

主人再拜稽首祝在左

註曰稽首服之甚者祝在左當為主人釋辭于神也

祝祝曰孝孫某敢用剛鬣嘉薦普淖用薦某事于皇

祖某子尚饗

卒祝主人再拜稽首

祝迎尸于門外

註曰尸自外來代主人接之就其次而請不拜不敢與尊者為禮周禮掌次凡祭祀張尸次

主人降立于阼階東

註曰主人不迎尸成尸尊尸所祭者之尊也祖之尸則主人乃宗祖禰之尸則主人乃父道事神之禮廟中而已出迎則為厭○疏曰祭統云君迎牲而不迎

尸別嫌也尸在廟門外則疑于臣在廟中則全于君君在廟門外疑于君入廟門則全于臣全于子

尸入門左北面盥宗人授巾

註曰侍盥者執其器就之執單者不授巾賤也宗人授巾庭長尊少牢饋食禮曰祝先入門右尸入門左尸至于階祝延尸尸升入祝先主人從

註曰延進在後詔侑曰延禮器謂詔侑武方者也少牢饋食禮曰尸升自西階入祝從主人升自阼階祝

先入主人從

尸即席坐主人拜妥尸

註曰妥安坐也

尸答拜執奠祝饗主人拜如初

註曰饗勸強之也其辭取于士虞記則宜云孝孫某
圭為孝薦之饗舊說云明薦之

祝命按祭尸左執解右取菹換于醢祭于豆間

註曰命詔尸也按祭祭神食也士虞禮古文曰祝命

佐食墮祭周禮曰既祭則藏其墮墮與桮讀同耳今
文改桮皆為綏古文此皆為桮祭也換醢者染于醢
○疏曰祭神食者向者陰厭厭飫神今尸祭訖當食
神餘也

佐食取黍稷肺祭授尸尸祭之祭酒啐酒告旨主人拜
尸奠解答拜

註曰肺祭剝肺也旨美也祭酒穀味之芬芳者齊敬
共之惟恐不美告之以美達其心明神享之

祭釂嘗之告旨主人拜尸答拜

註曰釂肉味之有菜和者曲禮曰客祭羹主人辭不

能烹

祝命爾敦佐食爾黍稷于席上

註曰爾近也近之便尸之食也

設大羹湑于醢北

註曰大羹湑煮肉汁也不和貴其質設之所以敬尸

也不祭不齊大羹不為神非盛者也士虞禮曰大羹

潛自門入○疏曰公食昏禮大羹潛皆在薦右此在
左者神禮變于生人士虞禮設于劔南在右與生人
同有不忍異于生故也云不為神者陰飫時未設尸
來始設為尸故士虞記云無尸則不授祭無太羹潛
載從獻

舉肺脊以授尸尸受振祭躋之左執之

註曰肺氣之主也脊正體之貴者先食啗之所以道
食通氣

乃食食舉

註曰舉言食者明凡解體皆連肉○疏曰乃食謂食肺云食舉謂骨體正脊

主人羞所俎于腊北

註曰所俎主于尸主人親羞敬也神俎不親設者貴得賓客以神事其先○疏曰所俎尸入乃設之故知主于尸

尸三飯告飽祝備主人拜

註曰三飯告飽禮一成也侑勸也或曰又勸之使又食少牢饋食禮侑辭曰皇尸未賓侑也

佐食舉幹尸受振祭濟之佐食受加于所俎舉獸幹魚一亦如之

註曰幹長脅也獸腊其體數與牲同

尸實舉于菹豆

註曰為將食庶羞舉謂肺脊

佐食羞庶羞四豆設于左南上有醢

註曰庶衆也衆羞以豕肉所以為異味四豆者饒炙
載醢南上者以饒炙為上以有醢不得絳也○疏曰
公食大夫禮牛炙南醢牛載西醢絳之次也此惟一
醢不得與載炙相對相對之法炙在南醢在北載在
北醢在南如此見得絳

尸又三飯告飽祝侑之如初

註曰禮再成也

舉酪及獸魚如初尸又三飯告飽祝侑之如初

註曰禮三成獸魚如初者獸骼魚一也

舉肩及獸魚如初

註曰不復飯食三三者士之禮大成也舉先正脊後肩自上而卻下絰而前終始之次也○疏曰先舉正脊自上也次舉脅即卻也後舉骼即下絰也終舉肩即前也前者牲體之始後者牲體之終

佐食盛所俎俎釋三个

註曰佐食取牲魚腊之餘盛于所俎將以歸尸俎釋

三个為改饌于西北隅遺之所釋者牲腊則正脊一
骨長脅一骨及臠也魚則三頭而已个猶枚也○疏
曰案下記云尸俎右肩臂臠肱胛正脊二骨橫脊長
脅二骨短脅○楊氏曰前已舉四體外今宜盛臂肱
橫脊短脅故知所釋者惟此耳

舉肺脊加于所俎反黍稷于其所

註曰尸授佐食佐食受而加之反之也肺脊初在菹

豆

主人洗角升酌醕尸

註曰醕猶衍也是獻尸也謂之醕者尸既卒食又却
頤衍養樂之不用爵者下大夫也因父子之道質而
用角角加人事畧者○疏曰不用爵次當用觚而用
角者因無臣助祭父子相養之道是質云人事畧得
用功少也

尸拜受主人拜送尸祭酒啐酒賓長以肝從

註曰肝肝炙也○疏曰亦當如少牢用俎鹽在右

尸左執角右取肝換于鹽振祭濟之加于菹豆卒角祝
受尸角曰送爵皇尸卒爵主人拜尸答拜

註曰曰送爵者節主人拜

祝酌授尸尸以醋主人

註曰醋報也祝酌不洗尸不親酌尊尸也古文醋作
酢

主人拜受角尸拜送主人退佐食授按祭

註曰退者進受爵反位尸將授主人佐食授之按祭

亦使祭尸食也其授祭亦取黍稷肺祭

主人坐左執角受祭祭之祭酒啐酒進聽嘏

註曰聽猶待也受福曰嘏嘏長也大也待尸授之以
長大之福也

佐食搏黍授祝祝授尸尸受以菹豆執以親嘏主人

註曰獨用黍者食之主其辭則少牢饋食禮有焉○

疏曰少牢尸不親嘏者大夫尸尊又大夫禮文此親
嘏者士尸卑禮質故也

主人左執角再拜稽首受復位詩懷之實于左袂挂于季指卒角拜尸答拜

註曰詩猶承也謂奉納之懷中季小也實于左袂挂祛以小指者便卒角也少牢饋食禮曰興受黍坐振祭濟之

主人出寫嗇于房祝以遵受

註曰變黍言嗇因事託戒欲其重稼嗇嗇者農力之成功

筵祝南面

註曰主人自房還時

主人酌獻祝祝拜受角主人拜送設菹醢俎

註曰行神惠也先獻祝以接神尊之菹醢皆主婦設之佐食設俎○疏曰佐食接尸祝接神故先獻前獻尸時菹醢主婦設之亞獻及致爵于主人蓮豆亦皆主婦設之則此設菹醢亦主婦可知少牢主人獻祝佐食設俎故此亦佐食設俎可知

祝左執角祭豆興取肺坐祭臠之興加于俎坐祭酒啐
酒以肝從祝左執角右取肝楨于鹽振祭臠之加于俎
卒角拜主人答拜受角酌獻佐食佐食北面拜受角
主人拜送佐食坐祭卒角拜主人答拜受角降反于篚
升入復位

疏曰獻佐食不言俎者上經云執事之俎陳于階間
二列北上鄭注執事謂有司以佐食亦在有司內者
下記有佐食俎也又下經賓長獻節注云凡獻佐食

皆無從其薦俎獻兄弟以齒設之

主婦洗爵于房酌亞獻尸

註曰亞次也次猶二主婦二獻不夾拜者士妻儀簡耳

尸拜受主婦北面拜送

註曰北面拜者辟內子也大夫之妻拜于主人北西面○疏曰少牢西面拜注不北面辟人君夫人然則士妻賤不嫌得與人君夫人同也

宗婦執兩籩戶外坐主婦受設于敦南

註曰兩籩棗栗在西

祝贊籩祭尸受祭之祭酒啐酒

註曰籩祭棗栗之祭也其祭之亦于豆祭

兄弟長以燔從尸受振祭躋之反之

註曰燔炙肉也○疏曰反之者謂反燔于長兄弟

羞燔者受加于所出

註曰出者俟後事也○疏曰云俟後事者謂俟主婦

獻祝之時更當羞燔于祝知者約上文主人獻尸云
賓長以肝從至獻祝時但云以肝從不言其人明亦
賓長可知此下文主婦獻祝遵燔從如初儀明獻祝
時亦長兄弟羞燔可知

尸卒爵祝受爵命送如初

註曰送者送卒爵

酢如主人儀

註曰尸酢主婦知主人儀者自祝酌至尸拜送如酢

主人也不易爵辟內子

主婦適房南面佐食按祭主婦左執爵右撫祭祭酒啐酒入卒爵如主人儀

註曰撫按祭示親祭佐食不授而祭于地亦儀簡也入室卒爵于尊者前成禮明受惠

獻祝邊燔從如初儀及佐食如初卒以爵入于房

註曰及佐食如初如其獻佐食則拜主人之北西面也○疏曰佐食北面拜受主婦不宜同面拜送故與

內子同

賓三獻如初燔從如初爵止

註曰初亞獻也尸止爵者三獻禮成欲神惠之均于室中是以奠而待之○疏曰待均者謂尸得三獻祝與佐食亦得二獻主人主婦各得一酢而已待主人主婦致爵乃均也此一科之內乃有十一爵賓獻尸一也主婦致爵于主人二也主人酢主婦三也主人致爵主婦四也主婦酢主人五也尸舉奠爵酢賓長

六也賓長獻祝七也又獻佐食八也賓又致爵于主人九也又致爵于主婦十也賓獻主人酢十一也

席于戶內

註曰為主人鋪之西面席自房來

主婦洗爵酌致爵于主人主人拜受爵主婦拜送爵

註曰主婦拜于北面也○疏曰約有司饋尸于堂

主婦致爵于主人主人致爵于主婦北面于阼階上

答拜是也

宗婦贊豆如初主婦受設兩豆兩籩

註曰初贊亞獻也主婦薦兩豆籩東面也

俎入設

註曰佐食設之○疏曰有司下大夫不備尸者主婦致爵于主人待佐食設俎彼室內行事與士禮畧同故知佐食設之也

主人左執爵祭薦宗人贊祭奠爵興取肺坐絕祭齊之興加于俎坐挽手祭酒啐酒

註曰絕肺祭之者以離肺長也少儀曰牛羊之肺離而不提心豕亦然扱拭也扱手者為絕肺染汚也扱肺不扱手

肝從左執爵取肝換于鹽坐根祭臍之宗人受加于俎燔亦如之興席末坐卒爵拜

註曰于席末坐卒爵敬也一酌而備再從而次之亦均

主婦答拜受爵酌醋左執爵拜主人答拜坐祭立飲卒

爵拜主人答拜○主婦出房于房主人降洗酌致爵于
主婦席于房中南面主婦拜受爵主人西面答拜宗婦
薦豆俎從獻皆如主人主人更爵酌醋卒爵降實爵于
篚入復位

註曰主人更爵自醋男子不承婦人爵也祭統曰夫
婦相授受不相襲處酢必易爵明夫婦之別○疏曰
案下記設洗篚在洗西賓二爵此賓長所獻爵尸奠
之未舉其篚唯有一爵得云易者上主婦亞獻洗爵

于房中則房中有爵又主婦獻祝及佐食訖以爵入于房後主婦致爵于主人還是房內爵後主人致爵于主婦者是下篚之爵主婦飲訖實于房中之篚主人更取房內之爵以酌酢酢訖奠于下篚云主人更爵者謂酌酢爵與房內爵相更

三獻作止爵

註曰賓也謂三獻者以事命之作起也舊說云賓入戶北面曰皇尸請舉爵

尸卒爵酢酌獻及佐食

楊氏曰上文賓三獻尸止爵不舉故未得獻祝與佐食待主人主婦致爵與酌神惠已均賓乃作止爵尸卒爵酢賓賓遂獻祝及佐食事之序也

洗爵酌致于主人主婦燔從皆如初更爵酢于主人卒復位

註曰洗乃致爵為異事新之燔從皆如初者如亞獻及主人主婦致爵也凡獻佐食皆無從其薦俎獻兄

弟以齒設之賓更爵自酢亦不承婦人爵○疏曰案
下篇不償尸洗爵致于主人註云以承佐食賤新之
此云為異事新之異事則是承賤承賤後則事異言
雖不同理則一也燭從如初則無肝從皆者謂主人
主婦嫌獻佐食亦然故云凡獻佐食皆無從下記云
佐食于旅也齒于兄弟故薦俎亦與兄弟同時設之
主人降阼階西面拜賓如初洗

註曰拜賓而洗爵為將獻之如初如視濯時主人再

拜賓答拜三拜衆賓衆賓答再拜者

賓辭洗卒洗揖讓升酌西階上獻賓賓北面拜受爵主
人在右答拜

註曰就賓拜者此禮不主于尊也賓卑則不專階主
人在右統于其位○疏曰所尊者謂尸也又賓是士
家有司

薦脯醢設折俎

註曰凡節解者皆曰折俎不言其體畧云折俎非貴

體也上賓駱衆賓儀公有司設之○疏曰有司徹注儀者尊體盡儀度餘骨可用而用之

賓左執爵祭豆奠爵興取肺坐絕祭嚌之興加于俎坐執手祭酒卒爵拜主人答拜受爵酌酢奠爵拜賓答拜

註曰主人酌自酢者賓不敢敵主人主人達其意

主人坐祭卒爵拜賓答拜揖執祭以降西面奠于其位位如初薦俎從設

註曰位如初復其位東面少牢饋食禮宰夫執薦以

從設于祭東司士執俎以從設于薦東是則皆公有
司為之與

衆賓升拜受爵坐祭立飲薦俎設于其位辯主人備答
拜焉降實爵于篚

註曰衆賓立飲賤不備禮鄉飲酒記曰立卒爵者不
拜既爵備盡盡人之答拜

尊兩壺于阼階東加勺南枋西方亦如之

註曰為酌賓及兄弟行神惠不酌上尊卑異之就其

位尊之兩壺皆酒優之先尊東方示惠由近禮運曰

澄酒在下

主人洗觶酌于西方之尊西階前北面酬賓賓在左

註曰先酌西方者尊賓之義

主人奠觶拜賓答拜主人坐祭卒觶拜賓答拜主人洗
觶賓辭主人對卒洗酌西面賓北面拜

註曰西面者鄉賓位立于西階之前賓所答拜之東

北

主人奠解于薦北

註曰奠解于薦左非為其不舉行神惠不可同于飲
酒○疏曰以其神惠右不舉生人飲酒左不舉今行
神惠不可同于飲酒故奠于左與生人相變下文奠
解于薦南明將舉以初在北飲酒將舉奠于薦南便
其復舉

賓坐取解還東面拜主人答拜賓奠解于薦南揖復位

註曰還東面就其位薦西奠解薦南明將舉

主人洗爵獻長兄弟于阼階上如賓儀

註曰酬賓乃獻長兄弟者獻之禮成于酬先成賓禮
此主人之義亦有薦胥設于位私人為之歟○疏曰
如賓儀則長兄弟初受獻于阼階上時亦薦脯醢設
折俎于阼上祭訖乃執以降設於下位皆當如賓儀
洗獻衆兄弟如衆賓儀

註曰獻卑而必為之洗者顯神意此言如衆賓儀則
知獻衆賓洗明矣○楊氏曰如西階獻衆賓儀坐祭

立飲薦俎設于其位辯

洗獻內兄弟于房中如獻衆兄弟之儀

註曰內兄弟內賓宗婦也如衆兄弟如其拜受坐祭立飲設薦俎于其位而立內賓其位在房中之尊北不殊其長畧婦人也有司徹曰主人洗獻內賓于房中南面拜受爵

主人西面答拜更爵酢卒爵降實爵于篚入復位

註曰爵便乃自酢以初不殊其長也內賓之長亦南

面答拜○疏曰對上賓與長兄弟不待獻衆賓衆兄弟徧主人先自酢也

長兄弟洗觚為加爵如初儀不及佐食洗致如初無從
註曰大夫士三獻而禮成多之為加也不及佐食無
從殺也致致于主人主婦○疏曰如初儀如三獻之
儀但三獻十一爵此唯有六爵洗觚獻尸一也尸酢
二也獻祝三也致爵于主人四也于主婦五也受主
人酢六也

衆賓長為加爵如初爵止

註曰尸爵止者欲神惠之均于在庭○疏曰已得三獻又別受加爵故傳之使庭行旅酬

嗣舉奠盥入北面再拜稽首

註曰嗣主人將為後者舉猶飲也使嗣子飲奠者將傳重累之者大夫之嗣子不舉奠辟諸侯○疏曰不言適而言將為後者欲見無適長立庶子及同宗為後皆是奠者即上文祝酌奠奠于鉶南是也

尸執奠進受復位祭酒啐酒尸舉肝舉奠左執觶再拜稽首進受肝復位坐食肝卒觶拜尸備答拜焉

註曰食肝受尊者賜不敢餘也備猶盡也每拜答之以尊者與卑者為禮畧其文耳○疏曰食若不盡直云啐之而已此云食肝明不敢餘也

舉奠洗酌入尸拜受舉奠答拜尸祭酒啐酒奠之舉奠出復位

註曰啐之者答其欲酢已也奠之者復神之奠觶嗣

齒于子姓凡非主人升降自西階

兄弟弟子洗酌于東方之尊阼階前北面舉觶于長兄
弟如主人酬賓儀

註曰弟子後生也

宗人告祭胥

註曰胥俎也所告者衆賓衆兄弟內賓也獻時設薦
俎于其位至此禮又殺告之祭使成禮也其祭皆離
肺不言祭豆可知

乃羞

註曰羞庶羞也下尸哉醢豆而已此所羞者自祝主人至于內賓無內羞○疏曰尸四豆饒炙哉醢此祝以下降于尸故云哉醢豆而已又下記云公有司獻次衆賓私臣獻次兄弟則內賓亦及之是以少牢下篇云薦羞庶羞于賓兄弟內賓及私人不賓尸亦云乃羞于賓兄弟內賓及私人辯是也若然少牢與有司徹饋尸與不饋尸庶羞與房中羞皆與尸佐食及祝

主人主婦皆同時羞之者彼上下大夫禮尊故得與尸同時羞此士禮卑故不得與尸同也尸尊尚無內羞祝卑故無內羞

賓坐取解

註曰薦南奠解○楊氏曰此即主人酬賓之解

阼階前北面酬長兄弟長兄弟在右

註曰特牲之禮堂下行旅酬無算爵並在室中者不與旅酬之事上大夫饋尸與旅酬不與無算爵之事

故別使二人舉解于尸侑尸侑得舉為旅酬徧及堂下尸與旅酬者以其儻尸在堂禮殺故也若下大夫不儻尸者堂下無旅酬直行無奠爵于堂下而已尸則不與之所以下大夫無旅酬直有無奠爵者以其禮尸于室中辟園君堂下不設尊故無旅酬直行無奠爵而已

賓奠解拜長兄弟答拜賓立卒解酌于其尊東面立長兄弟拜受解賓北面答拜揖復位

註曰其尊長兄弟尊也此受酬者拜亦北面○疏曰以其旅酬無算爵以飲者酌已尊酬人之時酌彼尊是各自其酒

長兄弟西階前北面衆賓長自左受旅如初

註曰旅行也受行酬也初賓酬長兄弟

長兄弟卒解酌于其尊西面立受旅者拜受長兄弟北面答拜揖復位衆賓及衆兄弟交錯以辯皆如初儀

註曰交錯猶言東西

為加爵者作止爵如長兄弟之儀

註曰于旅酬之間言作止爵明禮殺並作○疏曰此
決上文三獻爵止待室中致爵訖乃作止爵此旅酬
未訖作止爵故云並作

長兄弟酬賓如賓酬兄弟之儀以辯卒受者實解于篚

註曰長兄弟酬賓亦坐取其奠解此不言交錯以辯
賓之酬不言卒受者實解于篚明其相報禮終于此
其文省○疏曰奠解即上弟子舉解于其長是也賓

舉奠解于長兄弟行旅酬盡皆徧長兄弟舉解于賓
行旅酬亦皆徧交錯省文

賓弟子及兄弟弟子洗

註曰自此論二解並行無算爵之事

各酌于其尊中庋北面西上舉解于其長奠解拜長皆
答拜舉解者祭卒解拜長皆答拜舉解者洗各酌于其
尊復初位長皆拜舉解者皆奠解于薦右

註曰奠解進奠之于薦右非神惠也○疏曰同于生

人飲酒舉者奠于薦右也中庸旅酬下為上所以速
賤

長皆執以興舉觶者皆復位答拜長皆奠觶于其所皆
揖其弟子弟子皆復其位

註曰復其位者東西面位弟子舉觶于其長所以序
長幼教孝弟也九堂下拜亦皆北面○疏曰上既言
皆復位答拜此復重云復位則上文其位復在庭初
舉北面位此重言復位者當復東西面位可知云九

者賓以下至于私人拜受送皆北面故云凡也

爵皆無奠

註曰奠數也賓取解酬兄弟之黨長兄弟取解酬賓之黨唯已所欲亦交錯以辯無次第之數因今接會使之交思定好優勸之

利洗散獻于尸酢及祝如初儀降實散于篚

註曰利佐食也言利以今進酒也更言獻者以利侍尸禮將終宜一進酒嫌于加酒亦當三也不致爵禮

又殺也○疏曰上文設俎啓會爾孰之時以黍稷為食故名佐食今進以酒酒所以供養故名利利即養也

主人出立于戶外西面

註曰事尸禮畢

祝東面告利成

註曰利猶養也供養之禮成不言禮畢于尸間之嫌

尸諤祝前主人降

註曰讓起也前猶導也少牢饋食禮曰祝入尸讓主人降立于阼階東西面祝先尸從遂出于廟門前尸之儀士虞禮備矣

祝反及主人入復位命佐食徹尸俎俎出于廟門

註曰俎所以載胾俎少牢禮曰有司受歸之

徹庶羞設于西序下

註曰為將餼去之庶羞主為尸非神饌也尚書傳曰宗室有事族人皆侍終日大宗已侍于賓奠然後燕

私燕私者何也已而與族人飲也此徹庶羞置西序
下者為將以燕飲與然則自尸祝至于兄弟之庶羞
宗子以與族人燕飲于堂內賓宗婦之庶羞主婦以
燕飲于房○疏曰楚茨鐘鼓送尸下云備言燕私鄭
注祭祀畢歸賓客之俎同姓則留與之燕所以尊賓
客親骨肉也

筵對席佐食分簋劔

註曰為將餽分之也分簋者分敦黍于會為有對也

敦有虞氏之器也周制士用之變敦言盞容同姓之士得從周制耳祭統曰餼者祭之末也不可不知也是故古之人有言曰善終者如始餼其是已是故古之君子曰尸亦餼鬼神之餘也惠術也可以觀政矣宗人遣舉奠及長兄弟盥立于西階下東面北上祝命嘗食養者舉奠許諾升入東面長兄弟對之皆坐佐食授舉各一膚

註曰命告也士使嗣子及兄弟養其惠不過族親也

古文養皆作餼○疏曰此決少牢餼及異姓

主人西面再拜祝曰養有以也兩養奠舉于俎許諾皆
答拜

註曰以讀如何其久也必有以也之以祝告養釋辭
以戒之言文養于此當有所以也以先祖有德而享
于此祭其坐養其餘亦當以之也少牢饋食不拜者
非親昵也舊說曰主人拜下養席南○疏曰少牢有
二賓長是非親昵

若是者三

註曰丁寧戒之

皆取舉祭食祭舉乃食祭鉶食舉

註曰食乃祭鉶禮殺○疏曰正祭時尸祭鉶乃爾黍
卒食主人降洗爵宰贊一爵主人升酌酌上養上養拜
受爵主人答拜酌下養亦如之

註曰少牢饋食禮曰贊者洗三爵酌主人受于戶內
以授次養舊說云主人北面授下養爵

主人拜祝曰酌有與也如初儀

註曰主人復拜為戒也與讀如諸侯以禮相與之與
言女酌此當有所與也與者與兄弟也既知似先祖
之德亦當與女兄弟謂教化之

兩簋執爵拜

註曰答主人也

祭酒卒爵拜主人答拜兩簋皆降實爵于篚上簋洗爵
升酌酢主人主人拜受爵

註曰下養復兄弟位不復升也

上養即位坐答拜

註曰既授爵戶內乃就坐

主人坐祭卒爵拜上養答拜受爵降實于篚主人出立
于戶外西面

註曰事餒者禮畢

祝命徹胙俎豆籩設于東序下

註曰命命佐食胙俎主人之俎宗婦不徹豆籩徹禮

畧各有為而已設于東序下亦將燕也○疏曰豆籩
宗婦贊設之佐食設俎理應佐食還自徹俎宗婦徹
豆籩以徹禮畧故宗婦豆籩命佐食并徹之各有為
而已者謂宗婦徹祝俎豆籩佐食徹阼俎豆籩是各
自有為何必依前所設之時也

祝執其俎以出東面于戶西

註曰俟告利成少牢下篇曰祝告利成乃執俎以出
宗婦徹祝豆籩入于房徹主婦薦俎

註曰宗婦既並徹徹其卑者士虞禮曰祝薦席徹入于房○疏曰宗婦不徹主人豆籩而徹祝豆籩入房者為主婦將用之為燕祝接神尸之類宜行神惠故主人以薦羞并祝庶羞燕宗人于堂主婦以祝籩豆燕內賓于房

佐食徹尸薦俎敦設于西北隅几在南扉用筵納一尊
佐食闔牖戶降

註曰扉隱也不知神之所在或諸遠人乎尸謬而改

饌為幽闇庶其饗之所以為厭飫少牢饋食禮曰南
面如饋之設也所謂當室之白陽厭也則尸未入之
前為陰厭矣曾子問曰殤不備祭何謂陰厭陽厭也
○疏曰當室之白謂西北隅得戶之明者也與中不
得戶明故名陰厭○楊氏曰案釋宮云西南隅謂之
與西北隅謂之屋漏注與者隱與屋漏者當室之白
日光所漏入也

祝告利成降出主人降即位宗人告事畢賓出主人送

于門外再拜

註曰拜送賓也凡去者不答拜

佐食徹阼俎堂下俎畢出

註曰記俎出節兄弟及衆賓自徹而出唯賓俎有司徹歸之尊賓也○疏曰賓出主人送明賓不自徹若助君祭必自徹其俎

記特牲饋食其服皆朝服玄冠緇帶緇鞞

註曰于祭服此也皆者謂賓及兄弟筮日筮尸視濯

亦玄端至祭而朝服朝服者諸侯之臣與其君日視朝之服大夫以祭今賓兄弟嫁孝子欲得嘉賓尊客以祀其祖禰故服之緇鞞者下大夫之臣夙興主人服如初則固玄端

唯尸祝佐食玄端玄裳黃裳雜裳可也皆爵鞞

註曰與主人同服玄裳上士也黃裳中士雜裳下士設洗南北以堂深東西當東滌

註曰滌屋翼也

水在洗東

註曰祖天地之左海

篚在洗西南順實二爵二觚四解一角一散

註曰順從也言南從統于堂也二爵者為賓獻爵止

主婦當致也二觚長兄弟酌衆賓長為加爵二人班

同迎接並也四解一酌奠其三長兄弟酬賓卒受者

與賓弟子兄弟弟子舉解于其長禮殺事相接禮器

曰貴者獻以爵賤者獻以散尊者舉解卑者舉角舊

說云爵一升觚二升觶三升角四升散五升

壺於禁饌于東序南順覆兩壺焉蓋在南明日卒奠罍
用綌卽位而徹之加勺

註曰覆壺者盥滌水且為其不宜塵罍用綌以其堅
潔禁言於者祭尚厭飫得與大夫同器不為神戒也
○疏曰大夫用於士用禁大夫尊以厭飫為名士卑
以禁戒為稱又無足曰於有足曰禁鄉飲酒鄉射非
祭禮雖大夫去足猶存禁名至祭則去足為於禁不

為神戒也○楊氏曰卒奠酌奠于銅南時即位尸即席坐時

籩中以裕也纁裏棗烝栗擇

註曰籩有巾者果實之物多皮核優尊者可烝裏之也烝擇互文舊說云纁裏者皆玄被

銅芼用苦若薇皆有滑夏葵冬苴

註曰苦苦茶也苴苴屬乾之冬滑于葵詩云周原膾膾苴茶如飴○疏曰云冬滑于葵明冬不用葵而用

莛

棘心七刻

註曰刻若今龍頭

牲爨在廟門外東南魚腊爨在其南皆西面饎爨在西壁

註曰饎炊也西壁者堂之西牆下舊說云南北直屋
稻稷在南

所俎心舌皆去本末午割之實于牲鼎

註曰午割從橫割之亦勿沒立縮順其性心舌知食
味者欲尸之饗此祭是以進之○疏曰亦者亦少宰
文謂四面皆鄉中央割之不絕中央少許謂之勿沒
賓與長兄弟之薦自東房其餘在東堂

註曰東堂東夾之前近南

沃尸盥者一人奉槃者東面執匱者西面淳沃執巾者
在匱北

註曰匱北執匱之北亦西面每事各一人淳沃稍注

之

宗人東面取巾振之三南面授尸卒執巾者受

註曰宗人代授中庭長尊

尸入主人及賓皆辟位出亦如之

註曰辟位逡巡

嗣舉奠佐食設豆鹽

註曰肝宜鹽也

佐食當事則戶外南面無事則中庭北面

註曰當事將有事而未至

凡祝呼佐食許諾

註曰呼猶命也

宗人獻與旅齒于衆賓

註曰尊庭長齒從其長幼之序

佐食于旅齒于兄弟

尊兩壺于房中西墉下南上

註曰為婦人旅也其尊之節亞西方○疏曰設尊亞

次西方

內賓立于其北東面南上宗婦北堂東面北上

註曰二者所謂內兄弟內賓姑姊妹也宗婦族人之婦其夫屬于所祭為子孫或南上或北上宗婦宜統于主婦主婦南面北堂中房而北○疏曰內賓姑姊妹賓客之類南上自取曲禮云東鄉西鄉以南方為上宗婦雖東鄉取統于主婦故北上主婦南面故也

主婦及內賓宗婦亦旅西面

註曰西面者異于獻也男子獻于堂上旅于堂下婦人獻于南面旅于西面內賓象衆賓宗婦象兄弟其節與其儀男子也主婦酬內賓之長酌奠于薦左內賓之長坐取奠于右宗婦之娣婦舉解于其娣婦亦如之內賓之長坐取奠解酬宗婦之娣交錯以辨宗婦之娣亦取奠解酬內賓之長交錯以辨內賓之少者宗婦之娣婦各舉奠于其長並行交錯無算其拜及飲者皆西面主婦之東南

主婦贊薦者執以坐于戶外授主婦

尸卒食而祭饔饗雍燔

註曰雍熟肉以尸享祭寔有功也舊說云宗婦祭饔饗亨者祭雍燔用黍肉而已無運豆俎禮器曰燔燎于燔夫燔者老婦之祭盛于盆尊于瓶○疏曰老婦先炊者也盆瓶炊器也

賓從尸俎出廟門乃反位

註曰賓從尸送尸也士之助祭終其事也俎尸俎也

賓既送尸復入反位者宜與主人為禮乃去之

尸俎右肩臂臠肫脰正脊二骨橫脊長脅二骨短脅

註曰尸俎神俎也士之正祭禮九體貶于大夫有并骨二亦得十一之名合少牢之體數此所謂故而不敢者凡俎實之數奇脊無中脅無前貶于尊者不貶正脊不奪正也正脊二骨長脅二骨者將舉于尸尸食未飽不欲空神俎○疏曰故而不敢禮器注致至也

膚三

註曰為暮用二厭飲一也

離肺一

註曰離猶撻也小而長午割之亦不提心謂之舉肺

刊肺三

註曰為尸主人主婦祭

魚十有五

註曰魚水物以頭枚數陰中之物取數于月十有五

日而盈少牢饋食禮亦云十有五而俎尊卑同此所謂經而等也

腊如牲骨

註曰不但言體以有一骨二骨者

祝俎脾臠脊二骨脇二骨

註曰凡接于神及尸者俎不過牲三體以特牲約加其可併者二亦得奇名少牢饋食禮羊豕各三體○
疏曰脇二骨謂代脇接神者謂祝與佐食佐食尸未

入為神設俎卻會祝酌奠于銅南故曰接神也接尸者賓為三獻長兄弟為加爵尸盥宗人授巾皆是與尸相接也知皆三體者下佐食俎殼折脊脇也賓駘長兄弟及宗人折其餘如佐食俎故知皆三體也衆賓之長亦有加爵接于尸亦應三體下文但言兄弟及宗人而衆賓長亦在焉可知加其可併者二骨者是尊祝也佐食已下卑無加故下註云卑者從正是也少牢二牲故祝俎無加者直三體

膚一離肺一

胛俎臂正脊二骨橫脊長脇二骨短脇

註曰主人尊欲其體得祝之加數五體不加其可併者二亦得奇名臂左體臂

膚一離肺一

主婦俎殼折

註曰殼後足折分後右足以為佐食俎不分左膎折辟大夫妻○疏曰少牢主婦用左膎此士妻辟之不

用左臑用後右足不用後左足左足大卑故也

其餘如胙俎

註曰餘謂脊脇膚肺

佐食俎彘折脊脅

註曰三體卑者從正

膚一離肺一

賓胙長兄弟及宗人折其餘如佐食俎

註曰胙左胙也賓俎全體尊賓不用尊體為其已甚

卑而全之其宜可也長兄弟及宗人折不言所分畧之

衆賓及衆兄弟內賓宗婦若有公有司私臣皆穀齋

註曰又畧此所折骨直破折餘體可穀者升之俎一而已不備三者賤祭禮接神者貴凡骨有肉曰穀公有司亦士之屬命于君者也私臣自己所辟除者○疏曰云又畧者上文長兄弟及宗人直言折不言所折骨體已是畧此又不言折而言穀齋是又畧也接

神謂長兄弟及宗人以上俎皆三皆有臍肺衆賓以下不接神尸賤無獻也宗人雖不接神執中以授尸亦接尸也

膚一離肺一

公有司門西北面東上獻次衆賓私臣門東北面西上獻次兄弟升受降飲

註曰獻在後者賤也祭祀有上事者貴之亦皆與旅
○疏曰擇取公有司可執事者門外在有司羣執事

中入門列在東面為衆賓餘者在門西位不執事者
賤于執事者故曰有上事者貴之宗人獻與旅齒于
衆賓則公有司為之佐食于旅齒于兄弟則私臣之
中擇為之但賓俎公有司設之兄弟胥私人為之然
則公有司私臣薦俎皆使徒隸為之與

儀禮述註卷十五

欽定四庫全書

經部

儀禮述註卷十六

詳校官監察御史臣陳化龍

給事中臣溫常綏覆勘

總校官降調編修臣倉聖脉

校對官中書臣陸湘

滕錄監生臣袁瑩

欽定四庫全書

儀禮述註卷十六

少年饋餼禮第十六

安

李光坡 撰

鄭目錄二諸侯之卿大夫祭其祖禰於廟之禮

羊豕曰少牢。○疏曰：鄭知諸侯之卿大夫者，曲

下云：大夫士亦用少牢。是天子卿大夫明此

用少牢為諸侯之卿大夫可知。賓尸是卿不賓

尸為下大夫為異也

少牢饋食之禮

註曰禮將祭祀必先擇牲繫於牢而芻之羊豕曰少牢諸侯之卿大夫祭宗廟之牲○疏曰特牲不言牢但非一牲即得牢稱三牲具為大牢

日用丁巳

註曰內事用柔日必丁巳取其令名自丁寧自變改皆為謹敬必先諏此日明日乃筮

筮旬有一日

註曰旬十日也以先月下旬之己筮來月上旬之己筮於廟門之外主人朝服西面于門東史朝服左執筮右抽上韝魚與筮執之東面受命于主人

註曰史家臣主筮事者

主人曰孝孫某來日丁亥用薦歲事于皇祖伯某以某妃配某氏尚饗

註曰丁未丁亥也直舉一日以言之耳禘于太廟禮

曰日用丁亥不得丁亥則己亥辛亥亦用之無則苟有亥烏可也薦進也進歲時之祭事也皇君也伯某其字也大夫或因字為謚春秋傳曰魯無駭卒請謚與族公命之以字為展氏是也某仲叔季亦曰仲某叔某季某某妃某妻也合食曰配某氏若言姜氏子氏也尚庶幾饗歆也○劉敞曰丁己丁亥皆取於丁所以取丁者以先庚三日後甲三日也郊卜辛社卜甲宗廟卜丁無取於亥○楊氏曰上文日用丁己注云

取其令名自丁寧自變改謂十干丁日己日也如丁
亥己亥之類是也下文來日丁亥亦舉一端以明之
耳注家乃云不得丁亥則己亥辛亥無則苟有亥馬
可也此則不論十干之丁己而專取十二支之亥以
為解其失經文之意遠矣

史曰諾西面于門西抽下贛左執筮右魚執贛以擊筮
註曰將問吉凶為故擊之以動其神易曰著之德圓
而神

遂述命曰假爾大筮有常孝孫某來日丁亥用薦歲事
于皇祖伯某以某妃配某氏尚饗

註曰述循也重以主人辭告筮也假借也言因著之
靈以問之常吉凶之占繇○疏曰云遂述命者史既
受主人命乃右還向闕外西面遂述上主人之辭謂
之述命訖乃連言曰假爾大筮有常此是即席西面
命筮與述命同為一辭者對士喪禮卜葬日云不述命
若述命即與即席西面命龜異鄭云述命命龜異龜

重威儀多也對此少牢述命命筮同筮輕威儀少

乃釋贖立筮

註曰卿大夫之著長五尺立筮由便○疏曰云卿大夫之著長五尺者大戴禮三正記皆有此文立筮由便對士之著三尺坐筮為便若諸侯著七尺天子著九尺立筮可知

卦者在左坐卦以木卒筮乃書卦于木示主人乃退占

註曰卦者史之屬也卦以木者每一爻畫地以識之

六爻備書于板史受以示主人退占東面旅占之

吉則史贖筮史兼執筮與卦告于主人占曰從

註曰從者求吉得吉之言

乃官戒宗人命滌宰命為酒乃退

註曰官戒戒諸官也當共祭祀事者使之具其物且
齊也滌溉濯祭器掃除宗廟○疏曰筮日即齊故云
乃不云厥明也

若不吉則及遠日又筮日如初

註曰及至也遠日後丁若後已

宿

註曰宿讀為肅肅進也大夫尊儀亦多筮日既戒諸
官以齊戒矣至前祭一日又戒以進之使知祭日當
來

前宿一日宿戒尸

註曰皆肅諸官之日又先肅尸者重所用為尸者又
為特筮

明日朝服筮尸如筮日之儀命曰孝孫某來日丁亥用薦歲事于皇祖伯某以某妃配某氏以某之某為尸尚饗筮卦占如初

註曰某之某者字尸父而名尸也字尸父尊鬼神也不前期三日筮尸者大夫下人君祭之朝乃視濯與士異○疏曰天子諸侯前期十日卜得吉日則戒諸官散齋至前祭三日卜尸得吉又戒宿諸官使之致齋士卑不嫌故得與人君同三日筮尸但下人君不

得散瘳七日耳大夫尊不敢與人君同直散瘳九日
前祭一日筮尸并宿諸官致瘳

吉則乃選宿尸祝擯

註曰筮吉又選肅尸重尸也既肅尸乃肅諸官及執
事者祝為擯者尸神象○疏曰云既肅尸乃肅諸官
及執事者此重解上文宿是此宿尸後事置於上文
者彼為前宿一日宿戒尸之事故云其實當在此重
宿尸之後也

主人再拜稽首祝告曰孝孫某來日丁亥用薦歲事于
皇祖伯某以某妃配某氏敢宿

註曰告尸以主人為此事來肅

尸拜許諾主人又再拜稽首主人退尸送揖不拜

註曰尸不拜者尸尊

若不吉則遂改筮尸

註曰即改筮之不及遠日

既宿尸反為期于廟門之外

註曰為期肅諸官而皆至定祭早晏之期為期亦夕時也言既肅尸反為期明大夫尊肅尸而已其為賓及執事者使人肅之

主人門東南面宗人朝服北面曰請祭期主人曰比於子

註曰比次早晏在於子也主人不西面者大夫尊於諸官有君道也為期亦唯尸不來也

宗人曰且明行事主人曰諾乃退

註曰旦明旦日質明

明日主人朝服即位于廟門之外東方南面宰宗人西
面北上牲北首東上司馬刲羊司士擊豕宗人告備乃

退

註曰刲擊皆謂殺之此實既省告備乃殺之文互者
省也尚書傳曰羊屬火豕屬水○疏曰特牲視牲與
視殺別日今少宰不言視牲直言刲擊告備乃退者
省文此大夫禮視牲告充即刲擊殺之下人君士卑

不嫌故異日矣諸侯禮殺于門內此大夫與特牲士
皆殺于門外者辟人君

雍人概鼎七俎于雍爨雍爨在門東南北上

註曰雍人掌割亨之事者爨竈也在門東南統於主
人北上羊豕魚腊皆有竈竈西有鑊凡概者皆陳之
而後告潔

廩人概飩甗七與敦于廩爨廩爨在雍爨之北

註曰廩人掌米入之藏者甗如甗一孔七所以七黍

稷也

司宮概豆籩勺爵觚解几洗篚于東堂下勺爵觚解實于篚卒概饌豆籩與篚于房中放于西方設洗于阼階

東南當東榮

註曰放猶依也大夫攝官司宮魚掌祭器也○疏曰下文司宮筵神席於與此又掌豆籩之等故鄭云攝官

美定雍人陳鼎五三鼎在羊鑊之西二鼎在豕鑊之西

註曰魚腊從羊膚從豕統於牲

司馬升羊右胖髀不升肩臂膈脾髀正脊一胠脊一橫
脊一短脅一正脅一代脅一皆二骨以並腸三胃三舉
肺一祭肺三實于一鼎

註曰升猶上也上右胖周所貴也髀不升近竅賤也
肩臂膈肱骨也脾髀股骨脊從前為正脅旁中為正
脊先前脅先後屈而反猶髀之綽也並併也脊脅骨
多六體各取二骨併之以多為貴舉肺一尸食所先

舉也祭肺三為尸主人主婦

司士升豕右胖髀不升肩臂臑膊髀正脊一脰脊一橫
脊一短脅一正脅一代脅一胥二骨以並舉肺一祭肺
三實于一鼎

註曰豕無腸胃君子不食溷腴

雍人倫膚九實于一鼎

註曰倫擇也膚脅草肉擇之取美者

司士又升魚腊魚十有五而鼎腊一純而鼎腊用麋

註曰司士又升副倅者合升左右胖曰純純猶全也

○疏曰司士三人此明是副倅非升豕者

卒脅皆設扃籩乃舉陳鼎于廟門之外東方北面北上

註曰北面北上鄉內相隨

司宮尊兩甌于房戶之間同椀皆有冪甌有玄酒

註曰房戶之間房西室戶東也椀無足禁者酒戒也
大夫去足改名優尊者若不為之戒然

司宮設壘水于洗東有料設篚于洗西南肆

註曰料料水器也凡設水用罍沃盥用科禮在此也○
疏曰士冠直言水在洗東士昏鄉飲酒特牲器亦云
然皆不言罍器亦不云有科燕禮大射雖云罍水又
不言有科故鄭云凡此等設水用罍沃盥用科其禮
具在此

改饌豆籩于房中南面如饋之設實豆籩之實

註曰改更也為實之更之威儀多也如饋之設如其
陳之左右也饋設東面○疏曰前司官饌豆籩放於

西方今欲實之乃設豆籩於房中南面如饋之禮東面設者然特牲士禮視濯時豆籩劍在東房至實豆籩時直云豆籩劍陳於房中如初是其不改豆籩之處因而實之是士禮威儀畧也

小祝設槃匱與篋巾于西階東

註曰為尸將盥

主人朝服即位于阼階東西面

註曰為將祭也

司宮筵于奧祝設几于筵上右之

註曰布陳神坐也室中西南隅謂之奧席東面近南

為右

主人出迎鼎除鼐士盥舉鼎主人先入

註曰道之也主人不盥不舉

司宮取二勺于篚洗之兼執以升乃啟二尊之蓋冪奠于楹上加二勺于二尊覆之南柄

註曰二尊兩甒也

鼎序入雍正執一七以從雍府執四七以從司士合執
二俎以從司士贊者二人皆合執二俎以相從入

註曰相助

陳鼎于東方當序南于洗西皆西面北上膚為下七皆
加于鼎東枋

註曰膚為下以其加也南于洗西陳於洗西南○疏
曰膚者豕之實前陳鼎在門外時未有俎據鼎所陳
則膚在魚上今將載於俎設之最在後故須分別之

也加者以羊無別俎而豕有膚俎故謂之加

俎皆設于鼎西西肆所俎在羊俎之北亦西肆

註曰所俎在北將先載也異其設故不當鼎

宗人遣賓就主人皆盥于洗長杞

註曰長杞者長賓先次賓後也主人不杞言就主人者明親臨之

佐食上利升牢心舌載于所俎心皆安下切上午割勿沒其載于所俎末在上舌皆切本末亦午割勿沒其載

于所橫之皆如初為之于爨也

註曰半羊豕也安平也平割其下於載便也凡割本末食必正也午割使可絕也勿沒為其分散也所之為言敬也所以敬尸也周禮祭尚肺事尸尚心舌心舌知滋味

佐食遷所俎于阼階西西縮乃反佐食二人上利升羊載右胖髀不升肩臂臑膊骼正脊一脰脊一橫脊一短脅一正脅一代脅一皆二骨以並腸三胃三長皆及俎

拒舉肺一長終肺祭肺三皆切肩臂臑膊骨在兩端脊
脅肺肩在上

註曰升之以尊卑載之以體次各有宜也拒讀為介
距之距俎距脛中當橫節凡牲體之數及載備於此
○疏曰在雞足曰距在俎則俎足中央橫者也云凡
牲體之數及載備於此者案此經節折前體肩臂臑
兩相為六後體膊胛兩相為四短脅正脅代脅兩相
為六脊有三總為十九體唯不數骹二通之為二十

一體二穀正祭不薦於神尸故不言是牲體之數備於此

下利升豕其載如羊無腸胃體其載于俎皆進下

註曰進下變於食生也所以交於神明不敢以食道敬之至也鄉飲酒禮進腍羊次其體豕言進下互相見○疏曰公食鄉飲酒牲體皆進腍腍是本是食生人之法此言進未未為終謂骨之終食鬼神法

司士三人升魚腊膚魚用鮒十有五而俎縮載右首進

腴

註曰右首進腴亦變於食生也有司載魚橫之少儀
曰羞濡魚者進尾○疏曰生人死人皆右首鬼神進
腴者是氣之所聚生人進鰭者鰭是脊生人尚味也
引有司少儀者欲見正祭與饋尸載魚禮異又與生
人食禮不同有司徹進首是上大夫緹祭饋尸之禮
有乾魚橫於俎宜進其首則少儀羞濡魚者是天子
諸侯緹祭可知以其天子諸侯緹祭乾濕皆有乾魚

則進首鮮魚則進尾

腊一純而俎亦進下肩在上

註曰如羊豕凡腊之體載禮在此

膚九而俎亦橫載革順

註曰列載於俎令其皮相順亦者亦其骨體○疏曰
上牲體橫載文不明故舉膚亦橫載以明之此膚言
橫則上羊豕骨體亦橫載可知也

卒脣祝盥于洗升自西階主人盥升自阼階祝先入南

面主人從戶內西面

註曰將納祭也

主婦被錫衣移袂薦自東房韭菹醢醢坐奠于筵前主
婦贊者一人亦被錫衣移袂執葵菹羸醢以授主婦主
婦不興遂受陪設于東韭菹在南葵菹在北主婦興入
于房

註曰被錫讀為髮髻古者或別賤者刑者之髮以被
婦人之紒為飾因名髮髻焉此周禮所謂次也不纒

笄者大夫妻尊亦衣綃衣而侈其袂耳侈者蓋半士
妻之袂以益之衣三尺三寸袪尺八寸非蒞醢醢朝
事之豆也而饋食用之豐大夫禮葵蒞在綽○疏曰
追師注次次第髮長短為之云贊一人亦被錫則其
餘當與士妻同纁笄綃衣士妻與婦人助祭皆綃衣
服窮則同也云半士妻之袂以益之者士妻之袂二
尺二寸袪尺二寸三分益一故袂三尺三寸袪尺八
寸也醢人職朝事之豆彼天子八豆今取二豆饋食

豐大夫也若葵菹羸醢天子饋食之豆以當其節故
不須言之韭菹在南醢醢在北次東葵菹在北羸醢
在南是其綽也

佐食上利執羊俎下利執豕俎司士三人執魚腊膚俎
序升自西階相從入設俎羊在豆東豕亞其北魚在羊
東腊在豕東特膚當俎北端

註曰相助也

主婦自東房執一金敦黍有蓋坐設于羊俎之南婦贊

者執敦稷以授主婦主婦興受坐設于魚俎南又興受贊者敦黍坐設于稷南又興受贊者敦稷坐設于黍南敦皆南首主婦興入于房

註曰敦有首者尊者器飾也飾蓋象龜周之禮飾器各以其類龜有上下甲

祝酌奠遂命佐食啟會佐食啟會蓋二以重設于敦南
註曰酌奠酌酒為神奠之後酌者酒尊要成也特牲饋食禮曰祝洗酌奠奠于鉶南重累之

主人西面祝在左主人再拜稽首祝曰孝孫某敢用柔毛剛鬣嘉薦普淖用薦歲事于皇祖伯某以某妃配某氏尚饗主人又再拜稽首

註曰羊曰柔毛豕曰剛鬣嘉薦菹醢也普淖黍稷也
普大也淖和也德能大和乃有黍稷春秋傳曰奉粢以告曰潔粢豐盛謂其三時不害而民和年豐也

祝出迎尸於廟門之外主人降立于阼階東西面祝先入門右尸入門左

註曰主人不出迎尸伸尊也特牲饋食禮曰尸入主人及賓皆辟位出亦如之祝入門右者辟尸盥也既則後尸

宗人奉槃東面于庭南一宗人奉匱水西面于槃東一宗人奉簞中南面于槃北乃沃尸盥于槃上卒盥坐奠簞取巾興振之三以授尸坐取簞興以授尸巾

註曰庭南沒霤○疏曰庭南者於庭近南是沒盡門屋霤近門而盥也

祝延尸尸升自西階入祝從

註曰由後詔相之曰延延進也周禮曰大祝相尸禮

祝從從尸升自西階

主人升自阼階祝先入主人從

註曰祝接神先入宜也

尸升筵祝主人西面立于戶內祝在左

註曰主人由祝後而居右尊也祝從尸尸即席乃卻

居主人左

祝主人皆拜安尸尸不言尸答拜遂坐

註曰拜安尸拜之使安坐也尸自此答拜遂坐而卒食其間有不啐奠不嘗鉶不告旨大夫之禮尸彌尊也不告旨者為初亦不饗所謂曲而殺○疏曰不嘗鉶謂不嘗豕鉶饗者主為而孝薦之饗大夫尊媯與人君同士賤不媯也

祝反南面

註曰未有事也墮祭爾敦官各肅其職不命

尸取韭菹辨揆于三豆祭于豆間上佐食取黍稷于四
敦下佐食取牢一切肺于俎以授上佐食上佐食魚與
黍以授尸尸受同祭于豆祭

註曰牢羊豕也同合也合祭於俎豆之祭也黍稷之
祭為墮祭將食神餘尊之而祭之○楊氏曰切肺祭
肺也三取其一也俎豆當作菹豆

上佐食舉尸牢肺正脊以授尸上佐食爾上敦黍于筵
上右之

註曰爾近也或曰移也右之便尸食也重言上佐食明更起不相因○楊氏曰賈疏授尸下有尸受祭肺四字主人羞所俎升自阼階置於膚北

註曰羞進也所敬也親進之主人敬尸之加

上佐食羞兩鉶取一羊鉶于房中坐設于韭菹之南下佐食又取一豕鉶于房中以從上佐食受坐設于羊鉶之南皆芼皆有柶尸扱以柶祭羊鉶遂以祭豕鉶嘗羊

鉶

註曰芼菜也羊用苦豕用薇皆有滑

食舉

註曰舉牢肺正脊也先食啣之以為道也

三飯

註曰食以黍

上佐食舉尸牢幹尸受振祭躋之佐食受加于斝

註曰幹正脇也

上佐食羞載兩瓦豆有醢亦用瓦豆設于薦豆之北

註曰設于薦豆之北以其加也四豆亦絜羊豎在南
豕豎在北無腍脰者尚牲不尚味

尸又食食豎上佐食舉尸一魚尸受振祭絜之佐食受
加于所橫之

註曰又復也或言食或言飯食大名小數曰飯魚橫
之者異於肉

又食上佐食舉尸腊肩尸受振祭絜之上佐食受加于
所

註曰腊魚皆一舉者少牢二牲畧之腊必舉肩以肩為終也別舉魚腊崇威儀○疏曰特牲獸魚常一時

同舉

又食上佐食舉尸牢骼如初

註曰如舉幹也

又食

註曰不舉者卿大夫之禮不過五舉須侑尸○疏曰云五舉者舉牢肺一也又舉牢幹二也又舉一魚三也

又舉腊肩四也又舉牢骼五也是卿大夫之禮五舉也

尸告飽祝西面于主人之南獨侑不拜侑曰皇尸未實
侑

註曰侑勸也祝獨勸者更則尸飽實猶飽也祝既侑
復反南面

尸又食上佐食舉尸牢肩尸受振祭嚌之佐食受加于

所

註曰四舉牢體始於正春終於肩尊於終始

尸不飯告飽祝西面于主人之南

註曰祝當贊主人辭

主人不言拜備

註曰祝言而不拜主人不言而拜親疎之宜

尸又三飯

註曰為祝一飯為主人三飯尊卑之差凡十一飯下

人君也

上佐食受尸牢肺正脊加于所

註曰言受者尸授之也尸受牢幹而實舉于菹豆食
畢操以授佐食馬○疏曰上文初食舉謂正脊與牢
肺不言置舉之所此卻本初食約特牲舉肺脊其時
尸實舉于菹豆食尸食畢尸乃於菹豆上取而授上
佐食上佐食受而加於所

主人降洗爵升北面酌酒乃醑尸尸拜受主人拜

註曰醑猶羨也既食之而又飲之所以樂之

尸祭酒啐酒賓長羞牢肝用俎縮執俎肝亦縮進末鹽
在右

註曰羞進也縮從也鹽在肝右便尸換之○疏曰鹽
在肝右據賓長西面手執而言尸東面若至尸前鹽
在尸之左尸以右手取肝鄉左換之是其便也

尸左執爵右兼取肝換于俎鹽振祭噉之加于菹豆卒
爵主人拜祝受尸爵尸答拜

註曰兼兼羊豕

祝酌授尸尸醋主人主人拜受爵尸答拜主人西面奠爵又拜

註曰主人受酢酒俠爵拜彌尊尸

上佐食取四敦黍稷下佐食取牢一切肺以授上佐食上佐食以綏祭

註曰綏或作接按讀為墮將受嘏亦尊尸餘而祭之

主人左執爵右受佐食坐祭之又祭酒不興遂啐酒

註曰右受佐食右手受墮於佐食也至此言坐祭之

者明尸與主人為禮也尸恒坐有事則起主人恒立
有事則坐○疏曰禮罷周坐尸曲禮坐如尸立如齊

注齊謂祭祀時

祝與二佐食皆出盥于洗入二佐食各取黍于一敦上
佐食兼受搏之以授尸尸執以命祝

註曰命祝以嘏辭

卒命祝祝受以東北面于戶西以嘏于主人曰皇尸命
工祝承致多福無疆于女孝孫來女孝孫使女受祿于

天宜稼于田眉壽萬年勿替引之

註曰撤大也予主人以大福工官也承猶傳也來讀
曰登登賜也耕種曰稼勿猶無也替廢也引長也言
無廢止時長如是也

主人坐奠爵興再拜稽首興受黍坐振祭噉之詩懷之
實于左袂挂于季指執爵以興坐卒爵執爵以興坐奠
爵拜尸答拜執爵以興出宰夫以籩受黍主人嘗之
納諸內

註曰詩猶承也實於左袂便右手也季猶小也出出戶也宰夫掌飲食之事者收斂曰嗇明豐年乃有黍稷也復嘗之者重之至也納猶入也

主人獻祝設席南面祝拜于席上坐受

註曰室中迫狹

主人西面答拜

註曰不言拜送下尸

薦兩豆菹醢

註曰葵菹羸醢

佐食設俎牢髀橫脊一短脇一腸一胃一膚三魚一橫之腊兩髀屬于尻

註曰皆升下體祝賤也魚橫者四物共俎殊之也腊兩髀屬于尻尤賤不殊○疏曰髀短脅橫脊皆羊豕之下體四物者羊豕魚腊也腊用左右髀故有兩髀尻在中

祝取菹換于醢祭于豆間祝祭俎

註曰大夫祝俎無肺祭用膚遠下尸不瘠之膚不盛
○疏曰特牲祝俎有離肺無祭肺今俱無是遠下尸
無肺故不瘠

祭酒啐肝肝牢從祝取肝換于鹽振瘠瘠之不興加于
俎卒爵興

註曰亦如佐食授爵乃興不拜既爵大夫祝賤也○
疏曰此決特牲祝卒角拜主人答拜士卑故祝不賤
主人酌獻上佐食上佐食戶內牖東北面拜坐受爵主

人西面答拜佐食祭酒卒爵拜坐授爵興

註曰不啐而卒爵者大夫之佐食賤禮畧

俎設于兩階之間其俎折一膚

註曰佐食不得成禮於室中折者擇取牢正體餘骨折分用之有胥而無薦亦遠下尸

主人又獻下佐食亦如之其胥亦設于階間西上亦折一膚

註曰上佐食既獻則出就其俎特牲記曰佐食無事

則中庭北面謂此時

有司贊者取爵于篚以升授主婦贊者于房戶

註曰男女不相因特牲饋食禮曰佐食卒角主人受
角降反于篚○疏曰內則非祭非喪不相授器其相
授則女受以篚其無篚則皆坐奠之而後取之此經
雖不言受以篚及奠於地之事亦當然也

婦贊者受以授主婦主婦洗于房中出酌入戶西面拜
獻尸

註曰入戶西面拜由便也不北面者辟人君夫人也
拜而後獻者當俠拜也昏禮曰婦洗在北堂直室東
隅○疏曰特牲主婦北面拜註云北面拜者辟內子
也則士士妻卑不嫌得北面與人君夫人同也

尸拜受主婦主人之北西面拜送爵

註曰拜於主人之北西面婦人位在內此拜於北則
上拜於南矣由便也

尸祭酒卒爵主婦拜祝受尸爵尸答拜易爵洗酌授尸

註曰祝出易爵男女不同爵

主婦拜受爵尸答拜上佐食綏祭主婦西面于主人之北
受祭祭之其綏祭如主人之禮不嘏卒爵拜尸答拜

註曰不嘏夫婦一體綏亦當作按

主婦以爵出贊者受

註曰贊者有司贊者也

易爵于篚以授主婦于房中

註曰易爵亦以授婦贊者婦贊者受房戶外入授主婦

主婦洗酌獻祝祝拜坐受爵主婦答拜于主人之北卒爵不興坐授主婦

註曰不俠拜下尸也

主婦受酌獻上佐食于尸內佐食北面拜坐受爵主婦西面答拜祭酒卒爵坐授主婦○主婦獻下佐食亦如之主婦受爵以入于房

註曰不言拜於主人之北可知也爵奠于內篚

賓長洗爵獻于尸尸拜受爵賓尸西北面拜送爵尸祭

酒卒爵賓拜祝受尸爵尸答拜○祝酌授尸賓拜受爵尸拜送爵賓坐奠爵遂拜執爵以興坐祭遂飲卒爵執爵以興坐奠爵拜尸答拜○賓酌獻祝祝拜坐受爵賓北面答拜祝祭酒啐酒奠爵于其筵前

註曰啐酒而不卒爵祭事畢示醉也不獻佐食將儻尸禮殺○疏曰特牲賓長獻爵止時夫婦致爵此大夫禮或有儻尸者致爵在儻尸之上故不致爵爵不止也若然有司徹尸作止爵主婦致爵於主人主人不

酢主婦又不致爵于主婦下大夫不儻尸賓獻尸止
爵主婦致爵于主人酢主婦主人不致于主婦特牲
主人與主婦交相致爵參差不同者此以尊卑為差
降之數故有異也上大夫得儻尸故致爵上辟人君
下大夫不儻尸故增酢主婦而已士卑不嫌與君同
故致爵具也

主人出立于阼階上西面祝出立于西階上東面祝告
曰利成

註曰利猶養也成畢也孝子之養禮畢

祝入尸謾主人降立于阼階東西面

註曰謾起也謾或作休

祝先尸從遂出于廟門

註曰事尸之禮訖於門外

祝反復位于室中主人亦入于室復位祝命佐食徹所
俎降設于堂下阼階南

註曰徹所俎不出門將儻尸也所俎而以儻尸者其

本為不反魚肉耳不云尸俎未歸尸○疏曰曲禮謂
食時魚肉不反俎故尸食亦加胙俎今儻尸將更食
魚肉儻尸訖併後加者歸之

司宮設對席乃四人養

註曰大夫禮四人養明忠大也

上佐食盥升下佐食對之賓長二人備

註曰備四人餽也二餽亦盥升○疏曰不謂東西相
對直取上佐食東面下佐食西面為對以其下佐食

西面近北故不得東西相當也云賓長二人備者亦不東西相當以其一賓長在上佐食之北一賓長在下佐食之南是亦不東西相當也故云備不言對也

司士進一敦黍于上佐食又進一敦黍于下佐食皆右之于席上

註曰右之者東面在南西面在北

資黍于羊俎兩端兩下是餽

註曰資猶減也減置於羊俎兩端則一賓長在上佐

食之北一賓長在下佐食之南○疏曰兩下者據
二賓長地道尊右故二佐食皆在右必知上佐食東
面近南下佐食西而近北者以其尸東而近南今尸
起上佐食居尸坐處明知位次如此

司士乃辯舉鬻者皆祭黍祭舉

註曰舉舉膚○疏曰以尸舉肺下尸當舉膚是以特
牲云佐食授餽者各一膚明此大夫禮亦舉膚也

主人西面三拜鬻者鬻者奠舉于俎皆答拜皆反取舉

註曰三拜旅之示徧也言反者拜時或去其席在東面席者東面拜在西面席者皆南面拜

司士進一鉶于上饗又進一鉶于次饗又進二豆滑于兩下乃皆食食舉

註曰滑肉汁也○疏曰神坐止有羊豕二鉶故更羞二豆滑從門外饋中來

卒食主人洗一爵升酌以授上饗贊者洗三爵酌主人受于戶內以授次饗若是以辯皆不拜受爵主人西面

三拜養者養者奠爵皆答拜皆祭酒卒爵奠爵皆拜主人答壹拜

註曰不拜受爵者大夫餒者賤也答一拜畧也

養者三人興出

註曰出降實爵于籩反賓位

上養止主人受上養爵酌以醋于戶內西面坐奠爵拜上養答拜坐祭酒啐酒

註曰主人自酢者上養獨止當尸位尊不酌也○疏

曰不酌者將嘏主人在尸位不可親酌

上暮親嘏曰主人受祭之福胡壽保建家室

註曰親嘏不使祝授之亦以黍

主人興坐奠爵拜執爵以興坐卒爵拜上暮答拜上暮
興出主人送乃退

註曰送佐食不拜賤

儀禮述註卷十六